

25 JUL 1997

Dialog-tiba (bergambar)

PRESIDEN BOTSWANA TIBA UNTUK DIALOG LANGKAWI

LANGKAWI, 25 Julai (Bernama) -- Presiden Botswana Sir Ketumile Masire tiba di sini hari ini untuk menghadiri Dialog Antarabangsa Langkawi '97 mengenai Perkongsian Pintar mulai 28 hingga 30 Julai.

Ketibaan beliau disambut oleh Penasihat Sains kepada Perdana Menteri Tan Sri Omar Abdul Rahman, yang juga setiausaha bersama dialog ketiga itu.

Masire, yang mengetuai rombongan 25 anggota, tiba dengan sebuah jet eksekutif di sini kira-kira pukul 10.30 pagi.

Rombongan beliau termasuk Menteri Luar Lt Jen M.S Merafhe dan Menteri Perdagangan dan Industri K.G. Kgoroba.

Dialog itu akan mengumpulkan 250 pemimpin kerajaan termasuk 16 ketua kerajaan serta menteri-menteri daripada negara-negara Komanwel, tokoh-tokoh korporat dan pemimpin kesatuan sekerja tempatan.

Perdana Menteri Datuk Seri Dr Mahathir Mohamad akan menyampaikan ucapan pada perasmian itu yang akan diadakan di Berjaya Beach and Spa Resort di Teluk Burau.

Dr Mahathir ialah penaung dan penasihat dialog. Timbalan Perdana Menteri Datuk Seri Anwar Ibrahim akan menyertai dialog itu.

Sementara itu, lebih ramai rakan dialog akan tiba Ahad ini.

Mereka ialah Perdana Menteri Jordan dan Menteri Pertahanan Dr Abdul Salam Al Majali (serta sembilan anggota rombongan), Perdana Menteri Mauritius Dr Navin Ramgoolam (serta 18 anggota rombongan), wakil Presiden Afrika Selatan JT Radebe yang juga Menteri Kerja Raya, Presiden Namibia Dr Sam Nujoma (dan 30 anggota rombongan) dan Presiden Zimbabwe Dr Robert Mugabe (dan 41 anggota rombongan).

Naib Presiden Ghana Prof John Evans Atta Mills dan 11 anggota rombongan akan tiba esok manakala Naib Presiden Uganda Dr Specieza Wandira Kazibwe dan 30 anggota rombongannya tiba Ahad ini.

Ini adalah kali pertama Ghana dan Uganda menghantar wakil ke dialog itu yang dianjurkan bersama oleh Kumpulan Industri-Kerajaan Bagi Teknologi Tinggi Malaysia (MIGHT) dan Perkongsian Bagi Pengrusan Teknologi Komanwel (CPTM). -- BERNAMA

NH NAK